



● EDITORIAL ● RAL VENG TU ● CHHUNGKAW CHANCHIN

✚ Mizoram Presbyterian Kohhran than dan
✚ Missionary thar 111 tirh chhuah an ni
✚ Missionary chenna in kang ✚ Bial thar hawn belh a ni

RNI 68092/83 Regn. No. N.E. 1024

From

Synod Literature & Publication Board
Synod Office, Aizawl - 796 001,
Mizoram. Phone - 0389-2324590

SYNOD Newsletter

Volume XXVII

No. 352

E-mail : synodnews@gmail.com

JANUARY, 2013

Synod Moderator Kum thar Thuchah



RORELNA DIK

*“Nimahsela, rorelna dik chu lui angin luang sela, felna chu luipui kang
ngai lo angin luang rawh se,” (Amosa 5:24).*

A hmasa berin kohhranho leh Synod Newsletter chhiartu zawng zawngte Lal Isua hmingin kum thar chibai ka buk a che u. He kum thar lawmawm takah hian kohhran chhungkaw tinte hnenah Pathian ram lo thleng rawh se.

Kum thar Thuchah atana ka han thlan chu ‘**Rorelna dik**’ tih a ni a. Kawng hrang hranga then theih ni mah sela, ka’n sawi ber tur chu ‘*Ram Rorelna Dik*’ (Good Governance) a ni dawn a ni. Kan Pathian hi dik taka rorel thin Pathian a nih avangin ‘rorelna dik lo’ a ngaithei lo va. Kum zabi 8-na lai vel pawh khan Israel ramah rorelna dikin hmun a chang lo va. Thamna an la a, mi dik zawk dik lo zawkah an chantir a, bukna dik lo an khai a, duhamnaa khatin mi retheite chanvo tur thlengin an chhuhsak a. Pafain an chhiahhlawh nulate an inzen tawm a. An mi lian nuhoten an pasalte hlepruktirin zu in nan te an hmang a. An sual an sim duh loh avangin Pathian hremna nasa tak an hnam leh ram chungah a thleng ta a nih kha!

Kan rama sawrkar-na lo chelh tawh thinte leh chelh mektute hian rorelna dik hi kan kengkawh tak takin kan inhria em aw? Sawrkar hnathawktu tur kan lak danah te, hnathawktu indah leh insawn thu-ah te, kuthnathawktute kan enkawl danah te, development kai rual leh kai rual loh thu-ah te, dan bawhchhia leh hlep ru hriat chiente chungah kan hmalak danah te, mi rethei leh awm thei deuhte ro kan relsak dana bukna dik kan khai leh khai loh danah te, kan kawng chhe lutuk chungchangah te, zu leh drugs tam lutuk leh zalen lutuk chungchangah te, MLTP Act kan hman dan te leh thil dang dang han ngaihtuah hian kan ramah hian rorelna dik hian hmun a changin kan hria em aw? A khawi emaw laiah hian dik lo taka thil tih a awm a ni mai lawng maw? Kan Bible-in, “Dik lo takin ro in rel tur a ni lo; tu mah duhsak bik in nei tur a ni lo; thilpek in la tur a ni hek lo; thilpek chuan mi finge mit a tihdelsak a, mi felte thu a tikhawlohsak si thin a. Lalpa in Pathianin a pek che u ram chu nung dama in luah theih nan a fel chauhva chu in zawm tur a ni,” a tih te hi hriat thar leh a va tha em! (Deut. 16:19,20).

Kan hriat angin kuminah kan ram hruaitu turte kan thlang dawn a. Ram hruaitu tha, rorelna dik kengkawh thei tur mi kan thlan chhuah theih nan, thlangtu tur mipuite pawhin kan

inthlanna rilruah rorelna dik kan neih hmasak a ngai ang. Suma tihlungawi mai mai theih leh mahni dikna hralh duh khawpa rinawm lo kan nih chuan rorelna dik kengkawh tur hruaitu tha kan beisei thei lo vang.

Kan Bible chuan, “Mi sualin rorelna an chanin mite an rum thin. Dik taka lalin ro a rel chuan ram a phuisui a, thamna a lak chuan ram a chhe thin,” a ti a (Thuf. 29:2b,4). Rorelna dikin hmun a channa ramah chuan remna leh muanna a awm a. Dan leh hrai palzut a ni ngai lo va, dan hmangin rorelna kalpui a ni thin. Thiamna leh thurawn thin awmzia a nei a, hnathawktu taihmakna leh thawhrimna a thlawn ngai lo va, ramin hma a sawn a, a ding chhuak thin. Chutiangan lehlamah - rorelna dik lovin hmun a channaah chuan dan a lal lo va, hleih neihna avangin mipui phur a rit a. Mi haus a leh rethei kar a hla a, thamna leh bukna dik lo avangin mite an rum thin. Thurawn finge leh diknain ngaihchan a hlawn lo va. Sualin ngampa takin khawlaiah a hmel a pho lang a, dikna leh rinawmna a kimki thung thin.

Pathianin a Chanchin Thaa min zawn chhuahna ram luahtute khawsak mek dan hi Amosa te hun laia Israel-hote rorel dan leh nun dan nen khan a inang viau tawh em aw? Ram hi Lalpa ta a nih ang bawkin rorelna pawh Lalpa ta a ni a. Roreltuten Lalpa tih taka ro an rel chuan kan ram hi khawvel tan pawh chhenfakawm tak a la ni ang. Amaherawhchu, kan rorel danah Lalpa kan tih loh chuan kan rin aiin kan chhe thui viau thung ang. Mizoram hi Lalpan min pek a ni a, hei lo hi Zofaten ram dang kan nei lo tih hre thar leh ila; he ram dung leh vangah hian **Rorelna dik chu lui angin luang se la, felna chu luipui kang ngai lo angin luang rawh se. Amen.**

Lalramliana Pachau

(REV. LALRAMLIANA PACHUAU)
Moderator,
Mizoram Presbyterian Church Synod.

SYNOD Newsletter

EDITORIAL STAFF

Rev. K. Lalpiangthara (LPT)

Rev. Thangzauva (TZ)

Upa H. Ronghaka (HR)

Upa Khawlungnunga (KCN)

Editorial

LALPAA RINNA NGHAIH

Pathian hian mi lian leh thiltithe deuh te, mihring finna leh ban chakna te rinchan lova amaha rinna ngat tlat turin a mite min duh a (Sam 118:9; Jer 17:5). Hetianga min duh dan pawh a thu atang ngeia kan hriat lai hian, Lalpa lamah aiin mihring lamah hlawhtlinna hi awm zawk tlata hriain rinna kan lo ngat zawk leh thin.

Sawrkara hna kan dil nikhuaah pawh Pathian lamah aiin Bialtu MLA leh Unit hruaitute lamah rinna ngah len zawk mai a awl hle thin a. Kohhran hnuaia rawngbawlna tur hna ruak awm kan dilnaah pawh hian kohhran lama a hnarkaitute leh a latu tur Committee member lamte zar chhen mai duh pawlte pawh kan awm ta zel a. Thuneitute lam pawhin hetiang hi kan hnawl ngam a pawimawh hle. Hetiang rilruin kohhranah hmun a chang zau telh telh a nih phe chu Pathian ruat ni lo rawngbawltu tura inlak palh maite pawh thil hlauhawm tak tur niin a lang ta!

Mihringte hian kan hma lam hun tur tawng khat pawh kan hmu pha lo va. Kan tana tha tur nia kan hriatte pawh vanduin a lo ni thei a. Hna neih hmaa Biak In kawng zawh peih tak, hna avanga kawng lehlama kal ta daihte pawh sawi tur an awm zut mai. Rawngbawl hnaa mihring taka kan tan vaknate hi min tizaktu lek te pawh a ni ve thei tih kan hriat a pawimawh a. Hetiang lama kan hma lak danah hian Lalpaah rinnaa i ngat ngam ang u.

MISSIONARY TRAINING COLLEGE HRIATTIRNA

Missionary Training College (MTC)-ah Bachelor of Missiology (B.Miss.) zir duh tan dil theih a ni leh ta. Dilna Form hi office hun chungin MTC Office atangin lak chhuah theih a ni e.

Dil thei chin : CI-XII pass chin emaw, CI-X pass, kum 2 tal zirna lamah leh rawngbawlna lama experience nei.

Dil theih ni hnunung : February 28, 2013

Written Test : March 27, 2013

Interview : March 29, 2013

Principal
Missionary Training College
Mission Vengthlang
Ph No. 2310157/2301337/09612564113

MIZORAM PRESBYTERIAN KOHHRAN THAN DAN

Rev. Lalbiaktluanga
Bungkawng Tlang Veng

Chanchin Tha hruai luttu : 1871 - Alexandrapore run; 1872 - Vailen I; 1890 - vailen II;
1891 March 15, Chanchin Tha thlen hmasa.
1894 January 11, Chanchin Tha thlen hnunung.
1898 February 15, Sikul leh kohhran din tan.

KUM	KOHHRAN	THUHRILNA	MINISTER	PRESBYTERY	SYNOD	MEMBER	THAWHLAWM
1900	1	-	2	-	-	15	151
1905	1	14	2	-	-	86	276
1910	26	40	2	1	-	949	810
1915	114	148	7	1	-	7168	39312
1920	174	218	6	1	-	19814	12395
1925	250	297	13	1	1	34893	16530
1930	262	295	18	3	1	40062	11929
1935	294	316	22	3	1	63872	16216
1940	297	316	25	4	1	72173	14797
1945	321	347	36	5	1	84327	54900
1950	343	370	43	5	1	1,00,513	71752
1955	364	404	40	5	1	1,08,141	1,42,425
1960	392	393	46	6	1	1,25,293	1,63,520
1965	394	57	44	9	1	1,44,516	4,86,256
1970	223	19	56	9	1	1,51,078	7,77,491
1975	301	70	74	9	1	1,67,283	21,87,001
Pastor Bial							
1980	402	57	60	12	1	2,07,032	65,92,858
1985	447	74	71	14	1	2,29,682	1,34,01,147
1990	609	127	102	23	1	2,90,673	6,07,12,845
1995	679	171	118	25	1	3,38,464	10,36,45,052
2000	744	159	132	27	1	3,84,423	23,47,14,791
2005	1076	222	207	27	1	4,95,257	35,63,91,815
2010	1360	557	251	40	1	5,50,560	72,30,34,339
2011	1152	708	263	43	1	5,64,517	94,57,88,832

(Thulakna - Assembly Bu, Synod Bu; V.L. Siama, Lalhruaitluanga Ralte)

BIAL THAR 10 HAWN BELH A NI LEH TA

Kum kal ta 2012 Synod Inkhawmpuiin a rel bawhzuiin January 12 (Inrinni) khan Mizoram Presbyterian Kohhran chungah Pastor Bial thar hetiang hian hawn a ni-

Sl.No Bial Hming

1. Tlangnuam Bial (Aizawl)
2. Airfield Vengthar Bial (Aizawl)
3. Bungtlung Bazar Bial
4. Lunglei Bazar Bial
5. Khawhai South Bial
6. Chalrang Bial
7. Sihphir Vengthar Bial
8. Tuipang Bial
9. Tezpur Bial (Guwahati Mission Field)
10. Jarwadi Bial (Jharkhand Mission Field)

Hawngtu

- Rev. Lalramliana Pachauu
Rev. Dr. R. Lalbiakmawia
Rev. P.C. Pachhunga
Rev. Lalzuithanga
Rev. H. Lalrinmawia
Rev. K. Lalthangmawia
Rev. Zosangliana Colney
Rev. Vanlalzuata
Rev. K. Lalrinmawia
Rev. P.B. Zosaphara

Bial thar hawn tuk, January 13 (Pathianni) khan heng Bial tharah te leh Pastor/ Pro. Pastor inthlakna hmun hrang hrangah leh Pro. Pastor dah tharna hmunah te urhsun takin dah nghehna inkhawm (Induction Service) hman a ni bawk.



Thlasik ni lum ai paha Ral Vengtu titi ngaithla turin vengthlang paho chu ral ven buk kawtah an rawn chuang chhuak hlawm a. Ni paw zawnga thu pah chuan inthlan tur boruakte an sawi nak nak hlawm a. Ral Vengtu chuan thuthmun rem tha sauh sauh pahin thufing tak tak a han phuh chhuak mial mial a. Paho titi khawchang zulzuiin, "Mahni lawina kohhrana tha leh duhtui fu fu anga lang, kohhran sum khawihah pawh rin tlak deuh deuh thenkhat hi office leh politics lamah chuan duhtui lem lo leh rawngbawltu an nih anga nung zui hlei thei lo an awm thin a. Pulpit-a an au hla leh politics dawhsana an au hla a inang lo lutuk thin hi siamthat a tul khawpin ka hria. Politics tui nu tifim tura ngaihte politics tui nuin a tihnut theih an awm chhung hi chuan kohhran leh ram rorelna a kal dik tak tak thei lo vang," tiin ram boruak a hmuh dan a han phuh chhuak phawt mai a.

Vengthlang lam pa valai pakhat chuan meizial tan chung hian, "Kan politician-ho lah hian mipui cheng an dek thiam nasa si a, taihmakna leh thawhrimna zuar lovin sum an rawn inzawrh siak leh ang a, tam tak chu min bum leh em em ang. Sawrkarin inhlawhna min siamsak thin pawh hi Mizo rilru tichhetu, ram hmelm a tlingin ka hria. Thil reng reng awlsam tea kan hmuh chhuah chu ho teah a ral leh a, rim taka kan thawh chhuah hi a hman pawh a tlo zel zawkin ka hria. Kan ram mamawh chu sum aini thawhrimna a ni," a rawn ti ve a. Ral Vengtu chuan, "In harh tan dawnin ka hria, in thu hriat hi a taka in nunpui chuan in dam ang," a ti a. An titihona sawtpui hle dawna hriain an tin ta sang sang a.

PCI EXECUTIVE COMMITTEE

January 8 - 10 chhung khan PCI General Assembly Executive Committee, Silchar-a neihah Rev. Vanlalzuata, Senior Executive Secretary; Rev. Z.D. Lalhma-chhuana, Rev. Dr. Lalchhuanliana, Rev. H. Remthanga, Rev. Dr. Tlanghmingthanga, Rev. Dr. Zaihmingshanga, leh Upa R. Lalmalsawma te an kal.

MPF-IN CHAK LEHZUALIN

Mizorama Kohhran leh Tlawmngai Pawl liante thawhhona Mizoram People Forum (MPF) chuan MLA bye election leh kumin kum tawp lama General Election awm turah inthlanna thianghlim leh fel a awm theih nan chak lehzuale hma lak an tum.

MISSIONARY THAR 111 TIRH CHHUAH AN NI

Synod Mission Board hnuia missionary tura kum kal ta 2012 tawp lama lak thar 103 leh Synod Inkhawmpuiin ordained minister, Field Secretary/Missionary Pastor tura a dah thar pariat (an vaiin 111)-te Synod Mission Board-in a tih thin anga Thlahna Inkhawm urhsun tak buatsaih a nih hnuin January thla laihawlah hian an thawhna hmun lam panin an liam hlawm.

Missionary thlahna inkhawm hi January 6, 2013 khan Bungkaw Kohhran Biak Inah hman a ni a, missionary tirh chhuahte leh an chhungte leh hmun hrang hrang atanga he hun ngai pawimawha inkhawm an thahnem hle a; inkhawm zat hi mi 3,000 chuang zet nia chhut an ni. He inkhawm hi Synod Mission Board Secretary Rev. Lalchhuanmawian a kaihrui a, SMB Asst. Co-ordinator Pu Lalbiakenga Fanaiin missionary-a thlahte hmehhriattima hun a hman a; Synod Moderator Rev. Lalramliana Pachauvin urhsun taka tirh chhuahna hun a hman hnuin fuihna thuchah a sawi nghal a ni. Missionary kal chhuakte aiawhin mi pahnihin thu an sawi baw a; Bungkaw Bial Zaipawl leh Bungkaw Kohhran Zaipawlin hla an rem a; Synod Executive Secretary i/c SMB, etc. atana Synod-in a dah thar Rev. P.C. Pachhungan missionary tirh chhuahte puala tawngtaisakna hun a hman a; Bungkaw Bial vawngtu, Pastor T.C. Laltlanzovan malsawmnain a tin a ni.

Heng missionary tirh chhuah tharte hi Pastor 8, Evangelist Teacher (E/T) 39, Evangelist 52, Staff Nurse/Health Worker 8 leh Craft Teacher 4 an ni a. January 7 - 10, 2013 chhung khan J.M. Lloyd Hall, Synod Office-ah an hna thawh tur chungchanga hriat tur zirtir lawkna (Orientation Training) an nei a, heng hian an rawngbawlna atana tangkai tur thil chi hrang hrang zirtir an ni a; an vai hian January 20, 2013 aia tlai lova an hna thawhna hmunah an hna thar zawm theuh tura beisei an ni. Synod Mission Board hian a ngheta missionary hna thawk tur a lak thin dan kalhmang thlakin kum khat zel atan (contract basis)-in a la deuh ber tawh a; missionary-ten an duh chuan kum tinin hna thawh chhunzawmna tur an ziaak thar leh thin a ni. Hetianga thawk chhunzawmte hi chu tirh chhuah hranpa an ni tawh chuang lo va, tuna tirh chhuahte hi chu missionary hna thawk thar tur an ni hlawm.

Synod Mission Board hian missionary tur hian an hna thawh tur azirin HSLC pass lote tan pawh kawng an hawng ta zel a, tun tumah pawh hian mi thiam tak tak, Master degree nei, division sanga pass an awm laiin under matric pawh an awm.



FILM THEH LUT K.T.P BRANCH 23

Central K.T.P-in 'Mi dangte tana malsawmna' tih lam hawia film siam intihsiaak a buatsaihah Branch 23-in an film siam an theh lut a, endik tura ruatten an endik mek. Lawmman dawngte chu March 1-3, 2013-a Central K.T.P Rorel Inkhawmah puan a ni ang. Lawmman pakhatna Rs.30,000/-, pahniha atanga pangana (Top 5-a langho) Rs.10,000/- theuh pek an ni ang a, a tel zawng zawng hnenah Certificate pek a ni baw a. Film theh lut Branch-te -

Armed Veng South	Bawngkawn	Bawngkawn Chhim Veng	Bethlehem
Champhai Vengthlang	Chanmari West	Chhinga Veng	Chhinga Vengthlang
College Veng	Dawrpui	Durtlang	Kanan
Khatla South	Kolasib Venglai	Lallen	Lunglei Chanmari
Madanrtng	Mission Vengthlang	North Vanlaiphai	Ramhlun North
Sihphir Venglai	Tuikual	Zonuam	



Vangchhe Kohhran chuan November 2-18, 2012 chhung khan Agapa Gospel Rhema Team Speaker, C. Lallianthanga ruaiin camping chhawng hnih an buatsaih a, mi 332 an lut. Camper zingah Kohhran pawl dang mi eng emaw zat an awm a, Biak In thleng pha tawh lo leh khûp zawi leh ban uai thla tawhten siamtharna an chang a, Kohhranhovin an hlawkpui hle.

N. Hlimen Kohhran chuan November 3-18 chhung khan Doulos Revival Team te ruaiin Camping chhawng hnih leh naupang Lâng Camp an buatsaih a, puitling camp-ah 170 an lut a, an zinga 10 zet chu kohhran pawl dang mi an ni. Ruihtheih thila harsatna tawkte leh mi inthlahdah, Biak In thleng phak tawh loten Thlarau Thianghlim tihharhna changin hlim takin Pathian an fak a, Kohhran boruak a nuam hle.

Khawawn Kohhran chuan November 5 - 21, 2012 chhung khan Mi Lungngaite Thian Team Speaker, Pu F. Hmingthansanga ruaiin Gospel Camping chhawng nga an buatsaih a. Camp-a lut 500 zet zingah pawl dang mi 20 an tel. Biak In kawng zawh ngai loten an zawh thar a, ruihtheih thil ti thin ten bansanin Pathian an fak a. Kohhranhoten ropui an tiin lawmawm an ti hle.

Sawheng Hmuntha Kohhran chuan November 12 - 25 chhung khan T. Upa Zarzolia, Siamtharlehna Team ruaiin Camping chhawng thum leh naupang camp an buatsaih a, mi 400 zet an lut. Biak In thleng ngai tawh lo leh mi hnungtawhlthen siamtharlehna an chang a; November 24 khan mi thahnemngaite sum thawh khawm hmangin tisa leh Thlarau lam ruai theh a ni a, Pathian hnathawh ropui tak a thleng.

Phulpui Kohhran chuan ni Nov.17 - Dec.2, 2012 chhung khan Pu Lalsangzuala ngente, Ebenezer Team speaker ruaiin Camping chhawng hnih leh naupang Lâng Camp an nei a. Campers 242 an lut a. Camper zawng zawngte Pathian Thlarau Thianghlim pawlna changin an hlim hle.

Keifang Melveng Kohhran chuan Jehova Jire Team Speaker Pu C. Ramtharngaka ruaiin ni 17.11.2012 - 9.12.2012 chhung khan camping chhawng thum leh Naupang pual Lâng camp an buatsaih a, kohhran pâwl dang - UPC, S.A, SDA, IKK atangte pawhin mi eng emaw zat an lut baw. Upa Rângchhunga te chhungkuain bawng an thawh a, Dt. 4.12.2012 khan kohhranhovin Pathian chawimawina hun hlimawm tak an hmang.

Saitual Venglai Kohhran chuan Krista Khawngaihna Dawngtute Team Speaker T. Upa TBC Rokunga ruaiin ni 19.11.2012 - 2.12.2012 chhung khan Revival Crusade leh Naupang pual Lâng camp an buatsaih a. Kohhran pâwl dang

atang pawhin chhimtu an thahnem hle a, Kohhran mite thlarau lamah an harh thar a, Kohhran boruak pawh a nuam hle.

Parvatui Kohhran chuan Kros Hnehna Maicham Team Speaker Pu V.L. Chhuanawma ruaiin ni 23.11.2012 - 9.12.2012 chhung khan camping chhawng hnih leh Naupang Lâng camp an buatsaih a, camp-ah hian mi 117 an lut. Pathian thlarauvah harh tharna changin camp-a lut zawng zawng hi an chhuak vek a, kohhran boruak a nuam hle.

Mauchar Kohhran chuan Pathian Thuruk Enkawltu Team Speaker Pu Laltindawla ruaiin December 1-16, 2012 chhung khan camping chhawng hnih an buatsaih a, mi 294 an lut. Kohhran pâwl hrang hrang - EFCI, ICI, UPC (NEI), UPC (Mizoram) atangte pawhin mi thahnem tak an lut baw. Khawtlangah harhna lawmawm tak a thleng a, kohhran ngaihsak lo leh ruih theih thil titen Thlarau Thianghlim pawl tharna an chang a, kohhran boruak a nuam hle.

Nausel Kohhran chuan Remna Palai Team Speaker Pu C. Sapchhawna ruaiin December 1-16, 2012 chhung khan Rawngbawltu camp leh mipui camp an buatsaih a, kohhran ho an hlim hle. Upa Tualkhanthangan vaw a thawh hmangin ni 15.12.2012 khan Pathian hnena lawmthu sawina ruai an kil ho baw.

Thanglailung Kohhran chuan Joshua Operator Team Speaker Pu C. Lalnunsanga ruaiin December 3-15, 2012 chhung khan camping chhawng hnih an buatsaih a, mi 164 an lut. Kohhran pâwl dang - SA, IKK, UPC(NEI) atangin mi eng emaw zat an lut baw. Camp-a lut zawng zawng hi hlim takin an chhuak vek a, kohhran boruak a nuam hle.

Gharmura Kohhran chuan Hmangaih Fate Team Speaker Pu Laldintluanga Sailo ruaiin December 4 - 9, 2012 chhung khan Crusade an buatsaih a, kohhranhoten an hlawkpui hle. Kohhran pâwl dang atang pawhin mi eng emaw zatin an chhim a, Pathian hnathawh a lang nasa a, an lawm hle.

Tualpui Kohhran chuan Doulos Team Speaker Tv. Lalthlengkima ruaiin ni 24.11.2012 - 11.12.2012 chhung khan camping chhawng thum an buatsaih a, mi 285 an lut. Harhna chang zingah ruih theih thila harsatna taw. Ve thinte pawh an awm nual. Ni 9.12.2012 khan kohhrana mi inphalte thilpek leh Pu Vanlalhnuna vaw thawh hmangin tisa leh thlarau lam ruai hlim takin an kil ho.

Nghalchawm Kohhran chuan Ebenezer Revival Team Speaker Pu Lalsangzuala Ngente ruaiin Camping chhawng hnih an buatsaih a, kohhrana mi hla leh ruih theih thilin a tihbuaiten Pathianah lawmna thar an chang a, kohhran ho an hlim hle.

Lailak Kohhran chuan an Kohhranin an mamawh em em Biak In thutthleng 20, Ramhlun North Kohhran (Aizawl)-in an pe a. Ramhlun North Kohhran hnenah lawmthu an sawi.

HRIATTIRNA

Synod Revival Thurel Lakkhawm a bua siam chu Bial tinte tan Synod Revival Office-ah lam theih a ni e. Mahni Bial/Kohhran ta tur a rang lama lam theih ni se a lawmawm hle ang.

Director
Synod Revival

NUPA CHUNGCHANG DAN LEH KOHHRAN PAWL DANG NENA KAN INKUNGKAIHNA DAN 2012 (Bu khata siam) a chhuak thar a. Minister/Pastor, Inneihna kawltu leh Kohhran copy pakhat zelin Synod Office 'Mamawh Lamnaah' lam theih a ni e.

NGENNA

Mi mal, Kohhran leh Bial huapa Synod Office, lehkhaw dawr turte chuan phone number tarlan zel theih ni se. Kohhran leh Bial Letter head-ah phei chuan Bialtu Pastor leh Bial hotu pahnih pathum tal phone number dah zel ni thei se, a lawmawm hle ang.

Editorial Staff
Synod Newsletter

MISSIONARY CHENNA IN KANG

Arunachal & Assam Mission Field West Daporijo Bial chhunga Siyum khuua Mizoram Presbyterian Kohhran Synod Missionary-te chenna in chu December 27, 2012 zing dar 2:00 vel khan a kang a. In kan lai hian Evangelist Lalsangpuii leh Staff Nurse Zarzokimi te nupa (A pasal Lalruatdika) te an awm a; muttui hun laia kang a nih avangin a kang tih an hriat hian a lo kang nasa hman deuh tawh a; an tlan chhuahna lamah NI Sangpuii kephah a kang a, Pu Dika ban a kang baw.

He in kan dan chiah hi hriat theih ni lo mah se, tuin emaw a hal a nih rinna a lian a; tun hma leh tun hnaiah pawh thawktute hian tihthaih leh rikrap an lo taw. Tawh a ni.

Missionary-te hian an bungrua an chuh hman loh bakah in kang hian quarters hnaivaia Kristian in pahnih a man kai a, a kang ral ve ve vek baw. Pakhat hi Kraws Sipai thawk lai in a ni a; khawsak harsa ve tak tak an nih avangin an khawngaihthlak hle nia thu dawn a ni. Thawktute hi chu Daporijo Pastor Quarters-ah lak phei hrih an ni.

January 8, 2013 zan dar 11:00 vel khan Cachar Tlangrama Manikbond khuua Nurse chenna in a kang baw a, he in hi chu a luahtu awm loh lai a ni thung. Amaherawhchu Missionary Nurse-ten an hnathawhna hmanraw chi hrang hrang an dahte a kang ral vek a, bungraw dang awmte pawh eng mah chuh hman lohvin a kang ral vek a ni. Vanduaia tawkte tanpuina pe thei tan Synod Mission Board Office (Synod Office) Aizawlah pek theih a ni.